

Cumbatter la paupradad cun innovaziuns

■ (anr) **Ins po prevegnir a paupradad cun gidar giuvenils periclitads cur ch'els entran en la professiun, sustegnair creschids cun als promover u gia baud era pitschens uffants. Tar ina dieta da spezialists èn projects innovativs stads en il focus, sco quai che l'organ da l'Associaziun da las vischnancas svizas relate.** En Svizra èn – segund l'Uffizi federal per statistica – 7–8% da la populaziun pertutgads da la paupradad e tranter 13 e 14% en privel da daventar paupers. Privlus èsi era per uffants ord famiglias paupras, per tals ch'educeschon persuls, giuvenils e creschids senza clamada.

Tar la dieta a Berna han ins preschentà dacurt projects innovativs che mussan vias. Quels sa basan sin prevenziun, novas schliaziuns e sa concentreschan sin problems da la paupradad ch'ins ha fin ussa strusch resguardà. Uschia èsi vegnì rendì attent al project «Fribourg pour tous», in post creà per la populaziun nua ch'ins po s'infurmar

davart ils temas sco famiglia, socialesser, lavur, sanadad ed integraziun. Tgi che basegna vegn sustegnì segund la situaziun e cusseglia tenor basegns davart autras pussaivladads ch'existan.

En la Svizra tudestga han ins realisà il project «Ping pong». Quel sa basa sin la collavuraziun tranter famiglias ed instituziuns socialas. Ins vul sustegnair famiglias cun paucas resursas ed uschia promover lur uffants per dar ad els chaschun d'emprender insatge.

Er en il rom dal project «Masterggn e professiuns» collavuran interpresas da la regiun da Biel cun ils servetschs socials. Ellas porschan plazs per far praticums a tals che retrain agid social per uschia pussibilitar lur (re)integraziun en il mund professional.

Quella dieta è vegnida organisada en il rom dal program naziunal cunter la paupradad. Realisà l'inscunter ha l'Uffizi federal per segiranzas socialas ensemen cun la Conferenza dals directurs chantunals dal socialesser e las associaziuns da citads e vischnancas svizas.